

Fluors ed emoziuns pella nouva presidenta

La populaziun da Sent ed il Cumün da Scuol han fat in sonda passada il bainvgnü a Sent pella nouveletta presidenta dal Grond cussagl – per Aita Zanetti. Ella es gnüda accompagnada ed onurada da deputadas e deputats, da la regenza grischuna ed eir da «sia» glied da Sent.



Aita Zanetti circundada dals homens da la regenza grischuna e dal mas-chalch.



Gratulaziuns eir dal bap dad Aita Zanetti.

FOTOS ANDREAS CADONAU

ANDREAS CADONAU/FMR

Id es stat in sonda passada ün mumaint emoziunal pella nouveletta presidenta dal Grond cussagl, *Aita Zanetti*, cur ch'ella es rivada süin Plaz a Sent. La presidenta dal parlamaint grischun es nempe rivada direct davo la sessiun aint da Cuaira, accompagnada da deputadas e deputats, da la regenza grischuna e da las scheffas e dals schefs da las diversas partiziuns da l'administraziun chantunala. Fingia quai es üna flotta raspada. I s'ha però lura vis be subit, cha da verer lura tuot la populaziun radunada immez cumün e da dudir ils prüms tuns e suns da la Società da musica Sent han comoss ad Aita Zanetti, malapaina ch'ella es sortida dal bus dal «viadi special» sü da Scuol.

Tanter tuot la brajada preschainta süin Plaz a Sent d'ieran eir confamigliars ed amias ed amis da la presidenta dal Grond cussagl. Duos dals uffants dad Aita Zanetti han bivgnantà lur mamma cun tuns musicals, sco commembers da la Società da musica Sent.

Surprais da la carriera

Pel stret ravuogel da famiglia es la carriera politica vaira «rasanta» da la paura e mamma da quatter uffants eir ün pa üna surpraisa. Quai ha tradi a la FMR üna da las sours da la nouva presidenta. Dasper esser paura es ella al mumaint nempe ingaschada politicamaing sco vicecapo da Scuol, sco deputada, sco co-presidenta dal nouv parti grischun da l'Alleanza dal Center (AdC) e da nouv apunta eir sco plü ota deputada dal Grischun.

Jachen Zanetti ha observà la festa süin Plaz ün pa a l'ur. Il consort dad Aita Zanetti ha dit invers la FMR ch'el nu steta tant jent i'l center. Cun plaschair ha'l perquai surlaschà il palc a sia duonna e cun quai eir l'incumbenza da tour incunter las numerusas gratulaziuns, da far impringias e dad ingrazchar pel ingaschamaint cun metter ad ir la festa. Ün zich superbi da la recugnuschentscha demuossada in sonda passada in-

vers sia duonna ha el però tuottavia listess laschà badair.

Cha la nouva presidenta dal Grond cussagl es ferm inragischada a Sent ed eir i'l Cumün da Scuol nun es stat da survrer a la festa. La populaziun ha tadlà cun atenziun las explicaziuns süin piazza ed ha gnü plaschair da l'onur demuossada invers la convaschina. Ma la glied ha eir amo gnü gust d'alch oter, sco ch'üna persuna ha tradi: «Id es cool da verer qua üna jada tanta prominenz politica.»

Prominenz cun umur

E quella prominenz politica s'ha preschainta eir amo da tuot ün'otra vart in occasiun da las festivitats a Sent. Quai s'ha fingia muossà pro'l viadi aint da Cuaira, aint il tren nostalgic da la Viafier retica. Per üna jada nu sun statts las debattas e las tematicas politics aint il center, mabain la cumpagnia. Eir persunas da la politica pon sainz'oter avair bier umur!

Tradiziunalmang piglian perquai – adüna in occasiun da la festa dal nouv presidi dal parlamaint – il pled il president da la regenza grischuna ed eir ils schefs da las singulas fracziuns. Els piglian lura suot la marella «umoristica» las activitats ed ils exponents politics in Grischun. A Sent es quai stat il cas d'ürant il giantar in tenda da festa.

Uschè ha tanter oter eir il president da la regenza grischuna, *Mario Cavigelli*, recapitulà seis terminis da l'on passà, tanter oter eir ün inscunter cul nouv ovais-ch *Joseph Maria Bonnemain*. Quel haja insistì invers el cha la PCD e la PBD nu possan maridar be civil, mabain stopchan far quai eir in baselgia. Il nouv ovais-ch haja dit: «Maridar pon ils duos partits a Clostra, Tavo, Scuol o a San Murezzan. Il lö da la nozza nun es important. La nozza sto però esser catolica.»

Il Cumün da Scuol, inclusiv Sent, es in mincha cas refuormà. Il cumün ha in ogni cas fat tuott'onur in sonda passada a sia vaschina prominenz. Uschè cha eir il rest da la prominenz politica dal Grischun ha pudü tuornar saduollada e satisfatta a chasa da la sessiun d'avuost – be listess scha catolic o refuormà.

VEREINA



Ün tren da persunas ed ün transport dad autos s'han sriblats sonda davomezdi aint il tunnel dal Vereina. FOTO MAD

Pitschna collisiun aint il Vereina

Sonda davomezdi haja dat aint il tunnel dal Vereina – pro'l portal a Clostra – üna collisiun (üna sriblada) tanter ün tren chargià cun autos ed ün tren da persunas da la Viafier retica (VR). Tenor üna comunicaziun da la VR nun haja però dat ingüns ferits, però gronds dons vi dal material. Svelt es darcheu stat garantì il trafic per transportar ils autos – intant cha trens da persunas sun gnüts sviats d'ürant trais uras sur il traiget da l'Alvra. La procura publica dal Grischun e la Polizia chantunala han cumanzà cullas inquisiziuns per sclerir las radschuns da l'accidaint. (cdm/rtr/fmr)

GRISCHUN DA L'ON

Il premi fa il gir

Las lecturas ed ils lecturs da la gasetta «Südostschweiz» vaivan elet in marz da quist onn il persunal da chüra sco «Grischun da l'on 2020». Per üna jada pudaivan gnir elettas – causa la situaziun extraordinaria da la pandemia – interas gruppaziuns per quel titel. Gudagnà ha lura il persunal da chüra cun 42,6% da las vuschs. Uossa fa il pocal/bacher dals victurs eir fermativa aint il Center da sandà Engiadina Bassa (CSEB), sco cha l'organisaziun scriva in üna comunicaziun als meds da massa. Il bacher, in fuorma dad ün capricorn, farà d'ürant ils prossems dis il gir in tuot las instituziuns dal CSEB, tanter oter eir illa Chasa Puntota a Scuol, i'l Chalamandrin in Samignun o lura illa Gruppa da chüra Röven a Zernez. (cdm/fmr)

Il maraton da giubileum

Davo cha la cuorsa ha gnü lö l'on passà be süin ün traiget alternativ, es stat quist onn il 20avel Bike-Maraton dal Parc Naziunal darcheu sülla stricha originala. 1377 velociclistas e ciclistas han giödü la cuorsa gratiada pro bunas cundiziuns. Guadagnà il Bike-Maraton han tanter oter ün indigena ed ün victur da seria: Urs Huber e Tinetta Strimer.

BENEDICT STECHER/FMR ED RTR

Davo cha'l concept da sgürezza es gnü acceptà dal chantun Grischun e da l'Italia per Livigno han ils organisatuors, a lur testa il president da l'organisaziun, *Claudio Duschletta*, gnü glüm verda per dar l'attach. Per pudair accumplir las masüras da sgürezza s'haja decis da restrenschter il nomer da partecipants creschüts süin 1500. Claudio Duschletta ha eir muossà via avant la cuorsa cha eir quist onn ston gnir resguardadas las masüras da protecciun, perquai han partecipants, visituors e voluntaris stuvü als tgnair vi dal concept da sgürezza. Voul dir: ün numer da partenza han survgnü be partecipantas e partecipants chi han accumplì las trais reglas: vaccinà, testà o guarì. Pro la 20avla ediziun da la cuorsa ha Claudio Duschletta eir pensà in seis pled da salüid illa brochüra als iniziants da quella jada ed ha ingrazchà a quels per lur curaschi d'organisar ün dals plü gronds bike-maratons in Svizra. Eir a tuot la squadra d'organisaziun da la cuorsa cun var 400 voluntaris ha el drizzà ün grazia fich.

Fingia venderdi saira han gnü lö las cuorsas dals uffants in trais categorias cun 98 partecipants. La sonda a las 7.15 es statta la partenza da la cuorsa «Vallader» davent da Scuol (141 km) e da la cuorsa «Jauer» davent da Fuldera (107 km). Plü tard lura la cuorsa Livignasco (70 km), la cuorsa «Puter» davent da S-chanf (47 km) e davent da Zernez (33 km). Tuot las cuorsas cun böt süil stradun a Scuol han gnü lö 1377 partecipants. La differenza d'otezza da Scuol süin 1201 m s.m. ed il plü ot punct Chaschauna, tanter Livigno e S-chanf süin 2692 m s.m. ha pretais üna buna cundiziun.

Urs Huber ed Alexandra Zürcher

Our'd vista sportiva ha *Urs Huber* dal chantun Argovia scrit la plü bella istorgia. Urs Huber ha guadagnà la cuorsa per la tschinchavla jada. In tuot es el perfin fingia stat uschè 18 jadas süil podest da la cuorsa intuorn il Parc Naziunal. Quai es record. El ha guadagnà süil traiget «Vallader» avant *Markus Kaufmann* e *Marc Stutzmann*. Sülla stricha lunga «Vallader» ha guadagnà pro las



Cun ün surrier in fatscha süil Pass Chaschauna – la victura indigena Tinetta Strimer.

FOTO DOMINIK TÄUBER

duonnas *Alexandra Zürcher* avant *Bettina Schuler* e *Carmen Zaugg*.

Eir era our'd vista indigena haja dat ün success: *Tinetta Strimer*, ch'è s'vessa eir commembra dal comité d'organisaziun dal Bike-Maraton, ha guadagnà in möd suveran la cuorsa sur 107 km («Jauer»).

Bunas cundiziuns ed ün accidaint plü gravant

Las cuorsas sun gnüdas manadas tras pro bunas cundiziuns ed in möd fair, ed ils organisatuors han prestà üna lavur stupenda. Il 20avel Bike-Maraton restarà uschè in buna memoria. Pro'l böt süil

stradun a Scuol d'eira organisà ün post cun massaschas, ün post per pulir ils velos pro la chasa da scoula e la pussibilità da far la duscha pro'l bogn cuernà Quadras. Il facit da Claudio Duschletta es stat: «Displaschaivelmaing vaina gnü ün pèr accidaints, da quels chi sun its in schniffas sainza grondas blessuras ed ün da quels plü greiv.»

Tanter Bos-cha ed Ardez d'eira crodà ün curridur es vaiva feri al cheu. Perquai es el gnü svolà cul elicopter a Cuaira a l'Ospidal chantunala. Tenor infuormaziuns dad RTR s'haja però pudü constatar cha las feridas nu sun tant gravantas, uschè cha'l curridur po bainbod darcheu bandunar l'ospidal.

Il facit dal 20avel Bike-Maraton po dimena far il schef da l'organisaziun, Claudio Duschletta: «Tuots sun cuntants e nus da l'organisaziun eir.»

Ils resultats da las cuorsas as chatta sülla pagina d'internet www.datasport.com.